

# Dithoto tša ditsebi tša diteko tša radiolotši di tlhometšwe bakeng sa sekoloto sa motšhelo sa R52-million

**Tshwane, 25 Feberware 2022** – Dithoto tša ditsebi tše pedi tša diteko tša radiolotši di tlhometšwe ke Šherifi ya Kgorotsheko Kgolo bakeng sa dipušetšo tša motšhelo tša go se lefelwe le sekoloto sa motšhelo sa R52-million yeo e kolotwago go Ditirelo tša Motšhelo tša Afrika Borwa (SARS).

Balaodi ba bošomedi bja Bookelo bja Louis Pasteur ka Pretoria, *Drs Mkhabele and Indunah Diagnostic Radiologists Inc*, ke Ngk. Zulu Mkhabele le Ngk. Mevis Ponde.

Molefela motšhelo o dirile kgopelo go SARS bakeng sa kwano gomme e ile ya ganwa. Lengwalo la kganano le ile la romelwa go molefela motšhelo gammogo le lengwalo le le mpsha la kgopelo ya mafelelo. Molefela motšhelo o ile a se fetole bobedi lengwalo la kgopelo ya mafelelo le lengwalo la kganano.

Sekoloto se tloga go tšwa go dithomelo tše mmalwa tša dipušetšo tša motšhelo go SARS, go akaretša dipušetšo tša motšhelo wa letseno la khamphani, Lefela ka ge o gola (PAYE) le Motšhelo wa Boleng bja Tlaleletšo (VAT), ntle le ditefelo tša go feta sebaka sa mengwaga ye meraro.

Mo molatong o mongwe Šherifi o fantišitše dithoto tša Edison Power Gauteng Pty Ltd, khamphani ya kontraka ya motlhagase, morago ga ge khampahn e rometše dipušetšo tša motšhelo ntle le tefelo. Dithoto, tše di tlhometšwego ka Setemere ngwagola, di lekanyeditšwe go ba R20-million. Go se obamele ga Edison go tšeere sebaka sa mengwaga ye mebedi.

Khomisinare wa SARS Edward Kieswetter o boletše gore setheo se amogetše tebo ya leano la go hleka go nolofatša obamelo go balefela motšhelo, mola se fana ka tlhaloso le tiišetšo ka ga boitlamo bja obamelo ya bona.

“Re hlompha balefela motšhelo ba bantši ba go botega gape bao ba ikemišeditšego go obamela. Ka go dira bjalo ba kgatha tema go kabelo ya go kgoboketša ditseno tše di hlokegago go thuša go aga mmušo wa bokgoni bja go fana ka thekgo go badudi ka moka.

“Le ge go le bjale, go se obamele ka bomo, le bosenyi go tšwa go mothopo ofe goba ofe, di ka se kgotlelelw. SARS e tla diriša ditlabela ka moka tša semolao tše di ka dirišwago go thatafeletša le go lefiša ditefišo tša godimo go balefela motšhelo le le bagwebi bao,” Khomisinare wa SARS o boletše bjalo.

Go hwetša tshedimošo enngwe ikgokaganye le [SarsMedia@sars.gov.za](mailto:SarsMedia@sars.gov.za)